

Wulf Wagers wunderliche Weltbetrachtung

Posaunaexplosion



Jetzt diskutierat se wieder ohne Ende über die Reforma an dr Schul. Neulich isch en Vorschlag en da Raum gestellt worda, den die Musikverbände scho seit viele Jahrzehnte fordrat: Jedes Kend soll a Inschdrument lerna! Jawoll, do ben i au drfier. Aber 's dät scho langa, wenn die Erzieherinnen ond Lährer a bissle meh mit de Kendr senga dädat. A bissle weniger Chemie, Physik ond so, wär scho recht, wenn's do drfier meh Musik ond Sport gäb.

I erinnre mi no guad an mei Kindheit. I han an Haufa Inschdrument glernt. Des hoißt, i han an haufa a'gfanga, aber kois recht zuende brocht. Emmer des Inschdrument, auf dem i grad Ondrrecht g'het han, des hot me wenig

intressiert, aber die andere, wo en dr Eck' gstanda send, dodruf han i no g'übt. I war halt scho emmer an Individualischt.

No han i mir a Posaun' g'wünscht. Weil mir aber nia gnuag Geld g'het hend, hot 's bloß für a gebrauchte Posaun' glangt. So a Inschdrument ischt lackiert, damit mr des net so oft putza muass. Aber an a paar Stella war dr Lack ab. No han i denkt, dass i lieber

die Posaune häufiger putz, als dass se so komische Flecka hot. Gesagt, getan. I han en d' Badwann hoiß Wasser neiglasse, an Liter Waschbenzin drzuageba ond die Posaun' neiglegt. No ben i naus aus em Bad. I han nadierlich net g'wisst, dass Bezingdämpfe hoch explosiv send ond die sich an der Flamme vom Durchlauferhitzer entzünda kenntat! Mir hend drnoch 's Bad komplett renoviera miassa. Hätt' i no besser en Chemie ufpasset. Aber wenigstens war die Posaune ablackiert. Die han i heut no! Spieldua i au no ab ond zua, aber nemme putza!

Bis näggschd Woch'
Ihr
Wulf Wager